



Tir Yimyim

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7



Iran ken o timba angatettepogo, Strait of Hormuz lapoktsü: Trump



US den yimjung tezüngzüktep yanglutsü tejangja masü: Iran

VOL. XXIII ISSUE NO. 222 (ADOK 222) DIMAPUR SANGTENNÜ (TUESDAY) MONUPII (MAY) 26, 2026

₹ 5.00

Nagaland nung Bakrid sodi May 28-i thinener

Dimapur, May 25, 2026 (TYO): Nagaland Home department-i Id-ul-Zuha (Bakrid) anogo melenshiba osang metetdaksüogo.

Centre sorkari sangdong agütsüba ama May 27 nü Id-ul-Zuha amungtsü aliba May 28 nung ang amungtsü thinener ta Home department-i sangdong ka nung ashi.

Anungji Nagaland sorkar

kübok office ajaki Bodbar May 27 nung masü saka Brihostibarnü May 28 nung ang Bakrid sodi amungtsü ta parnokisa ashi.

May 22, 2026 nü Union Ministry of Personnel, Public Grievances and Pensions, Department of Personnel and Training (DoPT)-i ashiba ama iba temelenshi asür ta Home department-isa metetdaksüogo.

KTA-i 'one government, one tax' policy pusemer

Kohima, May 26, 2026 (TYO): Tawa tasen tentetba Kohima Traders Association (KTA) ajanga state yimtiba nung registered traders ajungtsü aser kümzüka ayutsü asoshi inyaksü nangzükogo.

Parnokisa "one government, one tax" tangatetba nung noktaksü aser shishilembabaren nung tashishitsü melii, ozüngi melaba ama aser timi inyaksü metetdaksüogo.

Kohima Traders Association (KTA) ya traders unions 15-Super Market, Naga Hospital, TCP Gate, Lower Para Medical, Upper Para Medical, Pezielietsie, High School, PR Hill, Razhü Point, Officers Hill, Traders Road Business Association Kohima, Y Junction, Highway Traders, Kezike aser Chandmari Traders Union külemi lokteper tentetgo.

KTA nung Ruokuohetuo Mechülho-i president aser Keneikhrielie Miachie-o-i general secretary inyaker.

Hotel Crescent, Kohima nung osangbener senden ka nung jembidang "KTA ya union balala kübok registered traders ajak asoshi külem sabang ka asütsü tentet. Iba ya shishilembartem tashi aitsü aser inyaksangshi kümzüka ayutsü atema lir" ta

president Mechülho aser general secretary Miachie-o nati ashi.

KTA-i Kohima nung traders aser business sectors asoshi common platform ka ama inyaksü aser monopolistic conduct, price-fixing o syndicate maparen anema noktaksü ta mendenpurtemi ashi.

KTA-isa "one government, one tax" policy pusema nungiter aser sorkar ketdangpurtem den amalitepa tashishitsü melii inyaksangshitsü aser ozüng alema inyaksangshiba azüoktsü ta mendenpurtemisa ashi.

Naga telungpur telok 35 tashi lir aser iba jagi shishilembartem itashia jenjang balala nung tax agütsütsüsa akümer. Iba ajanga consumers nem khuret talila benloksür kechiyong takoksa liabo shishilembaba masür ta parnokisa ashi.

KTA-isa lottery, ID cards, calendars aser ibala mesükba materials ayokba densema tashiyim agi sen saruba magizüktsü ta metetdaksüogo.

KTA ya sorkar, Kohima Municipal Council mesüra Kohima Chamber of Commerce and Industries (KCCI) amema masü saka parnok den külemi amalitepa ajak ajungtsü asoshi tentetba lir ta mendenpurtemisa jangjatsüogo.

Toulazouma nung ASF atema tenokdangba agütsür

Dimapur, May 25, 2026 (TYO): Chief Veterinary Officer, Chümoukedima ajanga African Swine Fever (ASF) prokshiba osang sangdongba nung ajemdaker Chümoukedima district nung tenokdangbatem agütsüogo.

Toulazouma Village nung ASF putet aser iba tesem nungi kilometre ka telongtet "Infected Zone" aser kilometre 10 telongtet "Surveillance Zone" asütsü ta Chümoukedima Deputy Commissioner, Polan John, NCS-i metetdaksüogo.

Iba tetuyuba kübok ak, akshi, ak chiyungtsü aser sendaktepa aliba ajak noktanger. Tanga

sangdong ka magütsü tashi 'containment zones' nung ak tepsetba, ayokba aser belenba ajak noktanger ta Chümoukedima DC-isa ashi.

Veterinary Department den ozüng amertemi mita aotsü aser preventive measures inyaksü ta paisa metetdaksü.

Iba tesem aser temeket nung aliba Village Councils, GBs, ward ketdangpurtem, shi alepertem, shi ayokertem aser public-i sangdong nung shia aliba sülen anidaksü aser ak shirangba mesüra asüba osang anasatiba Veterinary Office nem osang sangoktsütsü tetuyuba agütsüogo.

ECI-i NDPP-NPF loktepa agizükba atema pelar: Rio



Nagaland Town Council Bye-Elections 2026 atema NPF candidate 3-i NPF President Dr. Neiphu Rio aser tanga NPF lennirtem den külemi agiba noksa ka angur. (Kohima, May 25)

Kohima, May 26, 2026 (TYO): Election Commission of India-i NDPP-NPF ka küma loktepa agizükba atema pelar ta Nagaland Chief Minister & Naga People's Front (NPF) President Dr. Neiphu Rio-i ashi.

ECI nungi 'formal approval' anguba sülen NPF ya unified regional party ka ama züngsemer aser taoba NDPP joko mali akümer.

Town Council Bye-Elections 2026 asoshi ticket alemba sentong nung NPF President Dr. Rio-i party züngsem ajak dang NPF putiotsü nung iba ya senti mapang ka ama agizüktsü aser Naga nung tenzüktsü asoshi

bendanga agütsüshitsü ayongzük.

"Ni NPF nung tanaben adenba atema temulung sadoka bilemer. Iba party-i teti Naga nung temetentem aser maitsü kümzüka ayur ka ama inyaksangshia arur" ta pai ashi.

NPF ya Naga nung temetentem, maitsü aser akhüm asoshi noktaksü nükjidong nung dang tentet. Züngsem shiai iba senmang asoshi nüma atanger aser Naga nung asoshi nendaka inyaker, ta Dr. Rio-isa ashi.

"Naga lennirtemi NPF ajanga nübortem tenzükogo aser party-i Naga maitsü aser temetentem kümzüka ayutsü asoshi aiben

bendanga agütsüogo" ta paisa shisem.

NPF ya Constitution agi alenbanga lir aser züngsem shiai iba Constitution sülen anidaksü tezüngzüktep agir. NPF Constitution ajanga temulung lema nübor tenzüktsü telatetba agütsür ta Dr. Rio-isa metetdaksü.

Paisa Municipal Councilor tem dang public taginüba atema mezüng inyaksü aser inyaksangshi ajak party tetuyubatem sülen anidaksü ayongzük.

Dr. Rio-isa party züngsemtem tsüngda mangatettep madoktsü aser longjemer, tashi angatepa inyaka aotsü ayongzük.

Iba sentong nung MLA & NPF Secretary General Achumbemo Kikon-i candidate tem tejak shiyudang par asemprongi party Constitution sülen anidaksü aser nübor tenzüktsü ayongzük.

ULBs indang by-elections nung tokteptsüpur NPF candidate asem ya-Chümoukedima town Ward No. 11 nungi Neichüu Kuotsu, Atoizu town Ward No. 9 nungi Shikavi Kiba aser Wokha Town Ward No. 8 nungi Ar. Aling Lotha nung lir. Par asemprong nem Working President Pusazo Luroo-i tezüngzüktep agidaksü.

MARCOFED aser ERDE Agro nati aluyimertem yaritsü



MARCOFED aser ERDE Agro telok na tsüngda MOU renemba mapang agiba noksa ka yangi angur. Abelen nungi - ERDE Agro nungi Sukrut Mehta, MARCOFED MD. R. Bendang Ao, ERDE nungi Sanjiv Masalia aser MARCOFED mendenbuba Dr. M. Chuba Ao.

Dimapur, May 25 (TYO) : Nagaland nung aluyimba maparen ajanga aluyimertem jenjang tajungba küma ajungkettsütsü asoshi tanü Tentonü, Monupii (May) 25 nü MARCOFED aser ERDE Agro na longjemer inyaka aotsü asoshi inyakyim kar yanglua tangatettep ken o kar renema yuogo.

ERDE Agro Ecosystems Pvt. Ltd ya aluyimba tsütsü aluyimertem yariba telok ka lir aser parnoki aluyimertem alu ayimba maparen nung yariba dang masü saka aluyimertem züsentetba aonsutsü, süngjanglijang aser chiyongtsütem bendang lima balala nung ayoktsü asoshi lenmang bushitsür.

Tanü yangi Niathu Resort

nung iba ken o tangatettep renemba sentong nung jembidang, Additional RCS & MARCOFED Managing Director, Wb. R. Bendang Ao-i ERDE Agro ama aluyimertem dang tanü putu yimya nung alu ayimtsü sayutsü aser ano parnoki züsentetba agi sen akümtsü asoshi talirtem den sentaktepdaksütsü purtem den külemi inyaksüsbaji pelaa bilemer ta metetdaksü aser paisa sentong nung adenertem ajak dang shilem agia shisalemsateptsü ajungshi.

Iba kasa sentong nung MARCOFED nung mendenbuba Wb. Dr. M.Chuba Ao-ia ERDE Agro telok ajanga Nagaland nung aluyimba maparen nung küm ishika tsüngda terenlok tulu ataloka angutsü imlar ta

metetdaksü. MARCOFED aser ERDE Agro telok nati aluyimertem ajangzükdaksütsü bilema dang inyaksü ta paisa ashi.

ERDE telok yagi aluyimertem dang alu tajungba ayimtsü asoshi inyakyim sayutsü aser aluyimertem züsentetbatem ajak parnok ajanga company-temi alizüktsü. Iba atemaji aluyimertem o Company-tem na tsüngda tangatettep ken o, contract, kar renema ayutsü aser iba terenemba ken o nung ajemdaker alu ayimtsü. Iba dangji "Contract Farming" ta ajar. Iba aluyimba inyakyim nung aluyimertem telungjem telok, society aser FPO, tenteta inyakteptsü. ERDE Agro telok ya Mumbai nung amenoka aliba company ka lir.

Iba sentong nung ERDE Agro telok nungi Promoter & Director Wb.Sanjiv Masalia aser Sukrut Mehta nati shllem agia jembia liasü. Tena den yaritepa ERDE Agro telok nungisa North East Business Development & Operation Head, Dr. Lalit Wahengbam-ia ERDE Agro telok nükjidong aser inyakyim indang shia liasü.

Iba sentong nung menden MSRCOFED nung DGM Dr.Nükshilemla Imsong liasü.

Angh-i PMSS (ST) teyari agiba kaketshirtem den sensaksem aka



Nagaland Angh Nand Kishore Yadav den Post Matric Scholarship Scheme for Scheduled Tribe teyari agiba kaketshirtem Dr. Imkongliba Hall, Lok Bhavan, Kohima nung May 25, 2026 nü tangokba noksa ka yangi angur.

Dimapur, Monupii/May 25 (TYO): Nagaland Angh Nand Kishore Yadav-i Post Matric Scholarship Scheme for Scheduled Tribe teyari agiba kaketshirtem den sensaksema liasü.

Iba sentong ya Dr. Imkongliba Hall, Lok Bhavan, Kohima nung May 25, 2026 nü "Janjatiya Garima Utsav" benjongmung kübok ayongzüka liasü.

Angh-i iba sentong nung jembidang, scholarship scheme nungi tajangzük agirtem den sensaksemba asoshi pelaba lemsatop aser tribal freedom fighter Birsa Munda takum bilemteta iba sentong ayongzüka indang ashi, shiba tribal nisungtem asoshi tasü ita nokdaka liasü.

Tashi angutsü aser terenlok alitsü atema shisaluyim ya tongtipang lir, aser Post Matric Scholarship Scheme ya shisaluyim temaba jenjang bushia azüngba aser parnok tejangraba nung takok

ngudaktsüba nung temsüa aliba kaketshir yariba sentong tongtipang ka lir, ta pai ashi.

Pai kaketshirtem dang meranga azüngtsü, yimya tajung amshia alitsü aser parnok asoshi aliba maongka ajak amshitsü aser kasa mapang pei sobaliba den sendaka alitsü ayongzüka liasü.

Developed India mangdang asangsang akumtsü atema lanurtem, doctors, engineers, technocrats, kaketshir aser nübur ajungai tajungtiba nung pei mapa shidak inyaktüsü, ta ashi.

2047 tashinung "Viksit Bharat" kumer alitsü atema Nagaland nung aliba lanurtemi linük temelenshi nung tajung agi shilem agitsü tamang akar, ta Angh Kishore Yadav-i ashi.

Pai kaketshirtem dang ochishia, ajemalua, temeim agi nübur ajungtsü asoshi bendanga agütsür inyaktüsü ayongzüka liasü.

Pai state nung zünger mapa manguba tebilemtsü

samadaktsütsü asoshi skill development, entrepreneurship, vocational training, tourism aser aluyimba nung ajemdaker industries balala nung rangloktsü nüngdaker ta ashi. Paise Nagaland tejakleni aotsü atema shisaluyim tajung, ki o jen terenlok, telungjem aser yimjung nüngdaker ta shisem.

Iba sentong nung Sarita Yadav, IAS, Secretary, Higher & Technical Education menden liasü aser V. Lovitoly Sema, NCS, Addl. Secretary, Higher & Technical Education and Ex-Officio Director, Department of Higher Education ajanga iba sentong ayongzüka nükjidong lemsatopa liasü.

I. Sino Phom, Director, Department of Tribal Affairs ajanga melepzüng o jembia sentong tembang, kong Higher & Technical Education, Tribal Affairs Department nungi ketdangsurtem aser college balala nungi kaketshirtem dena liasü.

Diphupar A nung State-level Crèche Workers training agütsü

Dimapur, Monupii/May 25 (TYO): Mission Shakti Nagaland, Department of Social Welfare ajanga Palna - Anganwadi-Cum-Crèche (AWCC) kübok Crèche Workers atema State-level training ka Anganwadi Training Centre (AWTC), Diphupar A, Chumoukedima nung May 20-22, 2026 anogotema yongzüka liasü.

Sentong tenzüka Secretary,

Social Welfare Department, Government of Nagaland & Mission Director, Mission Shakti, Yongchingkumla-i okila o jembidang, state nung Palna centres timba akumba ajanga iba yagi organized aser unorganized sectors nung tetsür timba teyari angutsü, ta ashi.

Director, Social Welfare Department, Tosheli Zhimomi-i crèche workers dang

bendanga agütsür tenzüksü aser iba training sentong nung temulung agüja dener crèche facility nung tanur tem kumzüka ayutsüsa inyaktüsü ajungshia liasü.

Iba training tenzüksü sentong nung Asangla Jamir, Assistant Director, Social Welfare menden liasü aser Course Directors ya Unice, CDPO aser Limasangla, CDPO liasü.

Tuli nung SDPO Office semzükogo



Tuli nung May 22, 2026 nü SDPO Office tasenba semzükdang tangokba noksa ka nung SSP Mokokchung, Vesupra Kezo, NPS den SDPO Tuli Aketo Chisho aser tangartem angur.

Dimapur, Monupii/May 25 (TYO): Tuli nung SDPO Office semzükba sentong ka May 22, 2026 nü Tuli Police Station nung ketdangsurtem, police personnel, arogo lenirtem aser nüburtem lia semzükogo.

Iba sentong nung akhumdong ka ama Senior Superintendent of Police (SSP), Mokokchung, Vesupra Kezo, NPS dena liasü.

SDPO Tuli, Aketo Chisho-i iba sentong nung pela agizükba o jembidang, iba sentong ya office building tasen ka lapokba kisung masü saka subdivision nung police mapa inyakba aser nübur tenzüksü tsütsü tongtipang mera ka lir ta ashi.

Office ya tasen amenokba masü saka ADC Office premises nung aliba nungi tali temejava aser tesadamba kati belenba lir, ta pai jangjatsü.

Pai ADC Office, Tuli dang 1990s mapang nungi SDPO Office amenoka amshidaktsüba asoshi pelaba lemsatop aser ano police administration nung timtem majurutsüsa maneni yaritepba atema tenüngsang agüja liasü.

Paise nüburtem den teka amteper ochi nung ozüng shidak amshitsü department temulungtetba lir, ta nenshia ashi.

SCERT-i textbook nung aibelenba tatok meshir

Dimapur, Monupii/May 25 (TYO): State Council of Educational Research and Training (SCERT), Nagaland ajanga Nagaland Heritage Studies (Alternative English) Class 8 textbook nung Khamniungan kin tenüng aibelenba adokba asoshi tatok meshia liasü.

Khamniungan Students' Union, Noklak tir dangi züluba shiti ka nung, kin tenüng "Khamniungan" sernung aibelenba "Khamniungan" ta zülü, ta ashi.

Iba textbook renemba mapang kanga meranga

inyakba sernung memeteti aibelenba liasü, ta SCERT-i ashi.

Textbooks ya kaketshir angazüktsü asoshi tongtipang resources ka lir aser iba ama aibelen ajanga nüburtem mangmangdaksür aser timtem agütsür, ta ashi.

Tarutsü nung iba ama aibelen masütsü asoshi metongshitepa tali kumdangshia inyaktüsü, ta council ajanga ashi.

Parnoki aibelen ajiteta melenshitsü ashiba asoshi pelar aser aibelenba asoshi sasa bilemer aser tarutsü nunga amalitep aser tangatetep imlaa atar, ta SCERT ajangasa ashi.

Dimapur nung Field Trainers Training ayongzüksü

Dimapur, Monupii/May 25 (TYO): Census of India 2027 indang First Phase asoshi renemshia Dimapur, Niuland, Chümoukedima, Peren aser Mon district tem nungi ketdangsurtem asoshi asemnü Field Trainers Training programme alitsü, ta Deputy Commissioner and Principal Census Officer, Dimapur ajanga sangdongogo.

Training ya May 27-29, 2026 anogotem Circuit House, Dimapur nung agitsü. Ibai Directorate of Census Operations, Nagaland, Kohima nungi totuyuba agütsüba ama ayongzüker. Census operations tajungtiba nung agitettsü asoshi Field Trainers nem nüngdakba shisatsü, ozüng tangatetba, technical yimya aser practical exposure agütsütsü nükjidong nung iba training ya ayongzüker.

Iba training nung theoretical sessions, practical demonstrations aser field-based exercises alitsü. Mezüng anogo shilem agirtem registration agitsü aser iba sülen metetpelaba mapang alitsü aser Deputy Commissioner, Dimapur ajanga pela agizükba o jembitsü.

Iba session nung Census 2027 indang ozüng, Census Operations nung amshiba 'concepts' aser 'definitions', Enumerators aser Supervisors

den amalitep akatsü, HLB boundaries indang ground-truthing mechanisms, layout maps yanglutsü aser HLO Mobile Application inoka amshitsü indang sayutsü.

Tanünü recap aser quiz session agitsü aser iba sülen HLO questions indang intensive modules aser Enumerators aser Supervisors indang inyakyim rajemteptsü.

Practical demonstrations nung HLO App amshia telangzüba inokba yimya, supervisors temi data verification agiba aser self-enumeration exercises nung Enumerators aser Supervisors teinyaktütem indang ayimjemtsü.

Asemnü buba nung Census Act and Rules indang orientation agütsütsü, kilen shia nütsüng yongsük züludena aoba yimya, tenüng agütsütsü memulunger aser tensa balala ketdangzüba, asüngdangyaba yimya indang sayutsü.

Training agirtem role-play exercises aser field visits nung shilem agitsü aser iba mapang sample layout map yangluba aser data bendenba maparen inyangdangtsü.

Iba training atema shima aliba ketdangsur ajunga den Master Trainers aser Charge Officers tem ajak adentsü DC Dimapur-isa metetdaksü.

AR-I YANGPHI NUNG 'NASHA MUKT BHARAT ABHIYAN' AYONGZÜK

Dimapur, Monupii/May 25 (TYO): Assam Rifles temi 'Say No to Drugs, Yes to Life' omen nung ajemdaker PM Shri Government High School, Yangphi nung Akheda Amulung Kiphire (NGO) den lungjemer May 25, 2026 nü 'Nasha Mukt Bharat Abhiyan' ayongzüka liasü.

Temesepba mozü agi temang nung timtem agütsüba kaketshir aser lanurtem nem angatetdaksütsü aser temang anema alitsü asoshi takum yimya tajung angazükdaksütsü nükjidong nung iba sentong ya ayongzüka liasü.

Iba sentong nung shilem ka ama school telungzük nung süngdong atem aser awareness

ayongzüka liasü. Süngdong atemba ajanga libajen wazüka ayutsü tongtipang ta angazükdaksü aser ibaji teimla, terenlok aser temesepba mozü mamshiba lokti ka temaitsü liasü.

Seminar mapang shilem agirtem nem temesepba mozü amshiba ajanga temang nung timtem agütsüba indang angatetdaksü aser anema aliba lokti kumdaktsütsü asoshi shilem tajung agitsü ajungmesoa liasü.

Iba sentong nung kaketshir 200 shi aser tesayur trok den Assam Rifles personnel 12 tejangraba tulu nung shilem agia liasü. Iba sentong temer Assam Rifles temi kaketshir nem süngo jemdakja liasü.



Petrol aser diesel jenjang atuba anema Visakhapatnam nung CPI(M) lenirtem aser züngsemtemi motorcycle nunga longkak aitba noksa nung angur.

Petrol aser diesel litre shia nung ano sen 2 dak tali tuogo

New Delhi, Monupii/May 25 (Agencies): Hombarnü petrol aser diesel totzü jenjang tuogo; tesüiba hopta ana tsüingda tang agi pezübenbuba totzü jenjang atur.

May 15 nü mezüing petrol aser diesel jenjang atu aser Hombar tashi nung totzü jenjang atuba densemabo tang tashi nung totzü litre shia nung sen 7.5 tali tuogo.

Hombarnü petrol litre shia nung sen 2.61 atu aser diesel litre shia nung sen 2.71 atu.

Tang Delhi nung petrol litre ka nung sen 102.12 kümogo aser diesel litre shia nung sen 95.20 kümogo, ta ketdangsertemi metetdaksü.

Alima nung totzü tazü jenjang atuba aser 'rupee' jenjang tamajungba dang akümba ajanga India-i bendanglen nungi totzü alizükba nung sen teimba indoker.

India nung May 15 nü petrol aser diesel litre shia nung sen 3

tua liasü, iba sülen May 19 nü totzü litre shia nung poisa 90 atu, May 23 nüa petrol litre shia nung poisa 87 aser diesel litre shia nung poisa 91 tua liasü.

Hombanüa totzü jenjang atuba sülen tang Mumbai nung aliba PSU outlets nung petrol litre shia nung sen 111.21 aser diesel lire nung sen 97.83 agi ayoker. Kolkata nunga petrol litre nung sen 113.51 aser diesel litre nung sen 99.82 kümogo.

Chennai nunga petrol litre nung sen 107.77 aser diesel litre nung sen 99.55 kümogo.

State shia nung saru balala asüba ajanga state shia petrol aser diesel jenjang balala.

Opposition party temi, assembly elections tembangba sülenbo sorkari totzü jenjang atutsü, ta jembia liasü. Ajioda tawa BJP-i state asem assembly elections nung takok anguba sülen anogo ishika dang lirbo totzü jenjang atu tenzük.

Hombarnüa totzü jenjang

atuba sülen Congress lenir, Pramod Tiwari-i, "Tang T20 cricket tournament tasayadak, aser ibaji ajanga Ato kilonser Modi kanga pelar amai. Anogo 10 tsüingda pai records yangluogo. May 15 nü totzü jenjang sen 3 tali atu, May 19 nü ano poisa 90 atu, maneni May 23 nüa poisa 87 aser poisa 91 atu aser May 25 nü sen 2.71 atur, aser ibaji ajanga tangbo 'century' tongogo. Osettsüset nung jenjang tali atur, aser ibaji ajanga Ato kilonser Modi, nü dang 'Jenang atusang' ta ajar. Ni nü dang langka shiner. Ni langka mangateter. Alima market nung totzü tazü jenjang ajemer, barrel ka nung dollar sen 122 aliba nungi tangbo barrel ka nung dollar sen 98 dang kümogo, ajisüaka naibo jenjang atur. Iba ya Ato kilonser Modi den inyaksemer kar densema company kar tajangzük ngudaktsütsü atema dang inyaker amai," ta metetdaksü.

Australia Foreign Minister Penny Wong-i India semdangtsü

Canberra, May 25 (Agencies): Australia Foreign minister, Penny Wong-i lai India semdanga Quad Foreign Minister tem senden nung adentsü aser Australia-India Foreign Ministers' Framework Dialogue nunga shilem agitsü, ta metetdaksü.

Wong-i, "Tang alima tensa mejangjaba mapang ka nung Quad ya tongtibang partnership ka lir- Indo-Pacific region nung yimjung aser azükaru alitsü atema linük pezüi longjemer inyaksüji kanga tongtibang.

Australia, India, Japan aser United States linüktemi tzüiyim nung security, tongtibang minerals supply, infrastructure terenlok aser alima lendong mapang teyari agitsüba tsütsü wadang tulu inyaker," ta metetdaksü.

Laisa, "India semdangba mapang nungsa ni Minister for External Affairs Dr S. Jaishankar den külemi 17buba Australia-India Foreign Ministers' Framework Dialogue ayongzükba shilem agitsü," ta metetdaksü.

India External Affairs minister S Jaishankar-i jaokba nung ajemdaker, Australia Foreign minister Penny Wong, Japan Foreign minister Toshimitsu Motegi aser United States Secretary of State, Marco Rubio nungeri New Delhi semdanga May 26 nü Quad Foreign Minister tem senden nung shilem agitsü.

Parnoki Quad-i inyaka aruba mapatem asadangtsü, Indo-Pacific region nung tensa asadangtsü aser International onüktem nung o lemteptsü.

PM Modi convoy lenmang nung tapoktsü anguba atema police 6 anentsü

Bengaluru, May 25 (Agencies): May 10, 2026 nü Karnataka yimtiba, Bengaluru nung Ato kilonser Narendra Modi-i Art of Living (AOL) Foundation semdangba mapang nung pa senzüba lenmang nung security tsütsü tamakok anguba atema sub-inspector ka densema police trok mapa nungi anentsüogo.

AOL centre nungi kilometer 2 shi pilar Kuppareddy Kere nung Ato kilonser gari nung süia aotsü aliba lenmang nung tapoktsü oset aika angu.

Security tsütsü tamakok aludaktsüba atema Bengaluru South SP, R Sinivas Gowda tetuyuba nung sub inspector ka densema police trok mapa nungi anentsüogo.

Tapoktsü osettem rongnung gelatin sticks ana, mitsüksü, camphor, batteries, wires, time clock aser LCD display ka densema liasü. Oset ajakji gari lenmang nungi süklep ishika dang pilar carton box ka nung

angu. Ato kilonser Modi amenba gari aser pa meinba garitemi iba lenmangji sütsü ghonda ka ser tesadang jelia police constable kati cartoon box ji angu.

Mezüingbo police-i, box nungji gelatin sticks ana aser mitsüksü dang angu, ta ashi. Ajisüaka NIA-i iba tesem nungji bushisüingdangba mapang nung tanga oset-a aika angu.

Mezüingbo team aika Tamil Nadu aser Andhra Pradesh kübok district tem (Karnataka den arrtsülen aliba district tem)-i yoka liasü.

NIA aser Intelligence Bureau nungi züingsemtemi iba tesemji semdanga osang tejanga bushia liasü.

Forensic lab report ajangabo, carton box nung aliba gelatin sticks ji küm asem tejaklen yangluba liasü, time clock-a meshidak aser box nungji detonator maliasü, ta metetdaksü.



Agra, May 25, 2026: Hombarnü US Secretary of State Marco Rubio aser pa kinüngtsü, Jeanette D Rubio nata Taj Mahal semdangba mapang tangokba noksa nung angur. Yaküm US tatong Tir, JD Vance aser pa kinüngtsü, Usha Vance na den tena chirnurtem- Vivek, Mirabel aser Ewan nungeria Taj Mahal semdanga liasü.

Home Minister Amit Shah-i arrtsülen aliba state pezü semdangtsü

New Delhi, May 25 (Agencies): Union Home Minister Amit Shah-i state aika semdanga arrtsülen aliba tesemtem semdangtsü, aser ibaji arrtsülen security tensa asadangtsü aser arrtsü anükba agency tem tsüingda amalitepa inyaksü atema lir.

Shah-i arrtsülen aliba state tem - Rajasthan, Gujarat, Tripura aser West Bengal semdangtsü.

Pai Rajasthan kübok Bikaner mezüing semdangtsü aser May 26 nü India-Pakistan arrtsülen Border Security Force (BSF) outpost ka semdangtsü.

Pai BSF sepaitem den shisa lemsateptsü aser sepaitemi ajangshiba timtem balala angadangtsü, ta ketdangsertemi metetdaksü.

May 26 anüingdang Home Minister-i Bikaner nung senden ka ayongzükba arrtsülen aliba district nung security tensa asadangtsü. Iba senden nungji Ministry of Home Affairs nungi

tongti ketdangsertem, Rajasthan nung ketdangsertem, BSF officers aser arrtsülen aliba district pongu nungi ketdangsertem aser police tongti ketdangsertem adentsü.

May 29 nü Shah-i Gujarat kübok Bhuj semdangtsü aser yangjia pai BSF border outpost ka semdanga tensa asadangtsü.

June 5 nü pai Tripura semdangtsü aser India-Bangladesh arrtsülen security tensa asadangtsü.

Tesüsa June ita tomle pai West Bengal semdangtsü. Bengal nung pai security tensa asadangtsü, ta kasa osang ajanga metetdaksü.

Tawa West Bengal assembly election nung BJP-i takok ngua sorkar akümba sülen state nung ozüing alema arua aliba bendangertem mita aoba maparen tenzükogo, iba denji külemi arrtsülen atsü atsütsü atema state sorkari BSF sepaitem nem ali agitsüogo.



May 25, 2026 anepdang züingia Gujarat kübok Rajkot district anasa Gondal nung bus ka tsükokba sülen tangokba noksa nung angur. Temeshi ainlen jajar aika mena aliba bus tsükokba lendong nungji tetsür ana asü aser aika yiruogo.



TIR YIMYIM YIMOBILEM (EDITRIAL)

DIMAPUR TUESDAY, MAY (MONUPII) 26, 2026

Anü kanga tatsük mapang

Taküm küm ya linük nung yaküm küm dang nungibo kanga agia tatsükba asütsü ta tsüngsang mopong takzür India Meteorological Department (IMD)-i metetdakja lir. Aji oda, metsütsüi ano shitak tsüklawa Ammi (June) ita matongdang, tang Monupii (May) nung state aika nung anü tatsük asadangba nung 45 degree Celsius dang nungi teimba tua atsükba osang angashir aser item tesemtem rongnung, talisa, Telangana nungbo anü tatsük agi nisung 16 tashi puseta asüba osang asenoki yashi iba osangkaket ajanga angashiogo. Kasaji, tanga state-tem nunga anü kanga sashia apuba osang lir aser Telangana nung amaji nisunga sür alitsü. Iba ama alima nung tsüngsang mopong mejungi ajurudang timtem takoksa ajururtemji sensakertem teimba asütsü, kechiyong tanü poksung ayanga chiyongertem asoshiho anü apu, tzünglu aru aser yipru ait kecha mali mapai aotsüla. Iba jagi tang amai anü tatsük apuba mapang shi temang agi metizükteti mangmanga laoa asürtemji sensaker ayangertem aser talidak kia maka meshimetsüa jajaritem asütsü. Ibaji angateta Telangana nung anü tatsük agi puseta asür kibong shia nem par state government-i teyari sen lakh pezüzü agütsütsü nangzükba asür kibong asoshi teyari tuluka asütsü. Iba ama osangji asenok Nagaland nung alir Naga nung asoshiho tebangkatsüka lir aser Nagaland state government asoshia tebilemdangtsü aser tangazüktsü lesson tajung ka asütsü. Atangji, asenok Nagaland o Telangana naji akaba nung aser ochi ashiba ning medemdangtsüla masü, anungji Nagaland nungbo alima lendongtsüdong tulu ajurua asü ama atalokba mapanga aiben government-i teyari magütsüteter. Aji dang masü saka yipru mopong agi aser tzümetsung agi kiojen aser alu raksatsüba asoshia temenok magütsütetba state-ji asenok asütsü, kechiyong asenokbo sensaker lima. Ajisüaka, asenok sensakba ya makaba agi sensaker masü saka meinyakba agi aser ochimashiba agi sensaker, anungji koba anogo asenokia asenoksasa kenüa kidang mamong aseni akok mapa inyak tenzükdir aser koba anogo nung asenoki asen yimsüsüba, ketdangsuba aser tenzükba mapa nung ochi ashi tenzükdir, idangjiang asenoki metetmeteta takar kümer alitsü, anungji idangjibo asü ama aser lendongtsüdong ajururtem nem dang masü saka sensakertem taküm jenjang ajungkettsütsü aser lanurtem nema peisasa peii jangraba mapatem tenzüka inyaktetsüsa teyari agütsütettsü. Atangji, iba mapangji asen limaia arutsü saka mapang agitsü, anungji tang nungi asenok nisung shiai meilongi asüyonga ochi ashi tenzüksüla aser peisasa mapa reprangteta inyakba nüboritem akümtsüla. Iba ama mapang tajung ka arua ataa, tanü asenok anü tatsük aser yipru mopong agi taküm mesamatsüsa asenoksasa asenok kümdanga alitsübaji kanga nungdaker, kechiyong asenokbo sensaker state-ji asen talüm aser kibong nung asü ama aser timtem takoksa ajuruba mapang state government-i teyari magütsütettsü. Itemji kodang asenoki bilemdangdir, tanga state-tem nung alir sensakertem dang nungibo asenok Nagaland nung alir sensakertemsa tekümdangba kümdanga alitsüsa adoker. Atangji, tanü chiyongtsüa maka anü tatsük nung mapa inyaksüsa akümba tiaji temeimtsüka, anungji anü tsüka apuyonga mapai mao majungtsüla süra mapa inyakba mapang melenshitsu. Aji oda, akhi mapang anogo nung mapa inyakba mapangji anepdang 8:00 ako nungi nikongdang 4:00 ako tashi süra, mapangji tera melenshir anepdang 5 ako nungi 9:00 ako tashi aser nikongdang 2:00 ako nungi 6 :00 tashi inyakra, mapa inyakba mapangbo kasa saka anü tatsük nungibo kümzük ta asütsü. Tzümalen aluyimertemibo yamaji anungdang anü tatsük mapang kilong nung anisungzüka kazütsü aser anü tanük mapang anepdang aser nikongdang inyaker. Item lu nungji züsentedba asenok chiyonger. Kasaji, asenok atema dang masü saka anü tatsük apuba nungi kümzüka anepalutsübaji kaketshirtem ya lir, anungji anü kanga sashia apuba anogotem nungbo kaketrejutema, sodi agitsü melen anepdang 6:00 ako nungi 10:00 ako tashi danga class agirsa senshira, kaketshirtem anü tatsük agia timmatemtsü aser class magiba agia takoksa mangutsü.

OLEMSABANG

MERAJEMBA TEKUREM

~ L. Temjenwapang

(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

Ken mapang ka Nokinketer yimti nüburtemji tashi tawa, tasütait aser tesangra liasü, parnoki shinga metsübur. Yamaji merena litepa mapang, asangur ka aso tajung, tepur tajung jembu shinüji tetangshi, wanshin metetba taküm ano inyak

sangshia tashi, pa tenüng Wangshirenba, kibong tajung tsüraburji takar kika süchir. Par ya tanur ka dang anungji tsürabur jaki jabaso-ji azü ajak roseba meim.

Künep yakta Wangshiba nok aia angu, anungji parnok chiyongba mapang Ojalai ashi, Tebu asen alu inyaktsüji yimertem taah anir inyaktsü, ano ki mapa asü nunga ojala lir tu, na kangabo tebelem. Aya-a oja, asen asoshiho alu mapa inyaktsüji tebilemstü tulu kabu mali, saka asen dang teküboktiba tia nung alir aika lir anungji itemji yaritsü atema ni kanga jangrar. Obalai; Tebu nai ashibaji shidak asen sobaliba tajung beshitsü tiem, na tanü shir lu-i aotsü? Oba kü temba Rongjenba tsürabur mali tenu tena dang, anungji ni tanü par lu-i aotsü.

Obalai; Nai tanü nü temba yarinüba amaji teti medemer kati ka yaritepa alitsü-ji kanga tongtipang, shir yaritsüla ta ajiteter itemburji aseni akokba tashi nübu rongsen shisatsü agi yaritsüla, ano teti temulung nung ayutsüba kaji, kechi tia, mesüra kechi jenjang nung lidir liaka ochi o ochi mapa kodanga tamadok. Wangshiba chiyongzüker hojong hu tazüng nungji teka ataloka yur tebu ashiba o-temji tenok-tenok-a anga ali. Oba, tanep kechisa shiogo kü mulung nung teti rizünga ayutsü. Obalai; Temulung nung rizüngbaji-a junger saka beshitsü-ji sa tongtibangba.

Joko Chiyongtemer Ojalai mejemtsü bener arutsübaji agizüka ajem aser ashi, aya nütsü ya oda alima tetsü rongnung tajungtilai yangluba mejemtsü asüba agi ne mulungjang mesük kanga nanga yanglutetogo. Testü-i langzü, aji oda alima nung shir mulungsentsü merüka junga ali par tiabai sülabu, ne nungdem nung yangluba mejemtsüji ner tia agi ananger akoba, idangji Wangshibai par tsürabur kati ka den akümtsübuteba temeim o jembitepa ajakji anga alui aotsü renem.

Obalai ashi, Tebu meranga inyakang saka menu meyang teinyak, menur jjabaji lenmang nung arür nem sa menepdaktsür. Rongjenba; Temba nai ni tanü yamai yaritsü mulungtetba ya ni kanga pelar. Wangshiba; Nai pelaba amaji ni sa tepelaba kechiba süra ni na yaritsüsa mapang tajung ngutetbaji nia pela jangratemer.

Mapang kobi meli par lima Tsüngrem yimsü tajung aru, leptep tsüngtep anena aküm. Oli oratsü kechi-a tarendakstü mali, joko tekolak alepa anena aküm, sünep- sünepa yimjung nung tesem ka nungi ka aotsü kecha tetsübu mali sadoksadoka

Tsüngrem yimsü-ji par yimli ajak ayimsünga amangteper, tetsübuttsü kecha mali pelatepa litepa mapang ka. Yisu Khrista osang tajung agizük dang yimti nung tambutisang küm 104 Oboula Kümzüknenba, shisa taka taküm ka liasü, arishi anogo tonger Tsüngrem rah agi iba lima nungi pila ao, Tambuti asür asü nung yimer ajak sendener lepko munga ali dang ajungbena ola kanga tesashi aser kodanga mangashidangba ola ka angashi. Lepko mungur ajakji tsübutep, joko nisung ajaki olaji bushitsü tenzük, kari adem teko nung aser tsün, tsüngpang ajak nungji bushiteper saka mangur yamaji lulutepa alidang, Wangshirenba ya jeretperet asangur ka asü nung pai alilenji aküm anüla ka angu, anungji pai yakta anünglenji repranga yok, shiruru tuluka yima aor amai angu, idangji pai ya kechi, shiruru ta ayimden. Lepko mungur ajak kechamati

süngmanga achitep, tanem-tanemi olaji sama aküm. Joko par yimertu nisung shiai pei- pei reprangtetba nungi rata mata agi sünger tang shiruru mesük ka aoba otsüji kisung jembitsü tenzük.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung aliba tzüymkümlen nisung 2,000 dak tali baptiogo



Florida nung aliba tzüymkümlen nung baptidang tangokba noksa nung angur.

May 25, 2026: Anogo ishika tejaklen Jacksonville, Florida nung aliba Arogo kati ayongzükba sentong nung nisung 2,552 Atlantic Ocean tzüymkümlen baptiogo.

America tesem balala nung tanela asentenshi milak jangrua nisung aikati Yisu Khrista pei Kümtetdakba ta agizüka baptir.

'Baptize California' kübok Pirate's Cove nunga küm ana tsüingda nisung 50,790 baptiogo aser linük tesem balala nung 'Jesus Tent Revival' nunga nisung aikati Khrista agizüker.

Anogo ishika tejaklen

Florida tzüymkümlen agiba sentong nungji Church of Eleven22 nungi züngsem 14,000 dak tema aden aser 2,552 baptia liasü.

Iba tzüymkümlen nung parnoki tekülem sentong agi, sarasadem aser noklang aika baptiba atema Kibuba nung pelatepa liasü.

Church of Eleven22-i social media ajanga, "Nisung ka sülen ka, ta tzu jagi ajemoka Yisu Khristaji Kibuba aser Kümtetdakba ta nangzüka bapti. Tejenbaji süiogo aser taküm tasen kümogo! Baptiba

ajanga asenok kümzüker masü saka iba ya telung nung tanela tasen indang temaitsü tema nung sayuba lir," ta metetdaksü.

Yaküm-a kasa Arogoi ayongzükba sentong nung nisung 2,000 jungnüa baptia liasü aser 2024 küm nunga nisung 1,600 dak tali baptia liasü.

Pastor Joby Martin-i, "Arogo taküm lir, Tsüngrem Tanelai mapa inyakdar aser Yisu Khrista osangtajung ajanga tanü-a taküm aika melenshitsu," ta metetdaksü.

ANO GO ABEN TSÜNGREM DEN

Asüba ajanga süngjang tangtsür

Atangji zünpung ni nenok dang shidi, Tsükjang ka alinung tsüker mesüra, pa pei kija alir; saka pa süra pai tejang jenti atanger. (Yoh 12:24)

Yisu Khrista Yirusalemi takok ngua yir kulen pa asütsü indang jembir. Pa alimai arubaji Tebui mulungba inyaksü aru. Tsüngremi mulungbaji pa asuba ajanga alima nem tekumtet bener arutsütsü. Sungjang ka ali nung tsüker asunung ibaji ajanga tejang tangtet ama pa takuma yamaji inyaksü aru. Kodang na Khrista agizuka takum melenshir idangji ne temenen takum koba tejen nisung lir ibaji asür. (Rom 6:6). Saka ano yimya kar mesamai lir. Ibaji melenshitsu mapang agir.

Khrista majurudang na pei indang dang bilemba agi sunger alitsu akok. Pa ajuruaka mapang mapang nung ibaji ne dak nai angutsü, anogoshi temelenshiba dangi arutsü bendanga agujang. Aji mesura na meketa alir asoshi ne takumji temoatsü masutsü. Ne ain aser mit jagi tangar Yisu dangi arutsü aliba nokdangtsü. Ne nukjidong tulujü tim lenmang nung mamshira nai tangarji na ajunglen ataloktsü asoshi amshitsu. Saka na Khrista nung tasen poktetba takum asutsula aser temenen aser tashi mait ajak Pa nem bendanga agutsutsula. Ajakji ali nung remmang, süra iba jagi dang tejang tajung jenti atangtsü.

Kenya nung general election jakdang Arogoi KNPTM tenzük



May 25, 2026: Sangküm Kenya nung General election agitsü lia Kenya nung Evangelical Arogo lenirtemi Kenya National Prayer & Transformation Movement (KNPTM) tenzüka sensotem dang sarasademtsü, tatok meshitsu aser longjemtsü ayongzüker.

Tan ita tetenzüklen linük yimtiba, Nairobi nung "Kü Linük, Kü Teinyaksü Shilem' omen nung ajemdaker agiba sentong nungji putirtem, pastor tem, ministry balala nung lenirtem aser Khristan lenirtem aika liasü.

Sentong ayongzükertemi ashiba agi, linük nung aliba Counties 47 prongla nung maneni sarasademtsü aser linük atema sarasademtsü asoshi nisung million 1 ayongdentsü nukjidong nung KNPTM ya tenzüker.

Evangelical Arogo lenirtemi, tang Kenya nung rongsenkettzüng dak sendakba timtem tuluba-tuluba dang

akümer, yimtenren tensa majung, ochimashi lir aser mapa manguba den külemi chiyungtsü/osettsüset nung jenjang kanga atuba ajanga sensotem rongnung tetsübu lir, ta metetdaksü.

Arogo nung lenirtemi, "Iba ya tanelar temoatsü meshiba tetenzüker ka lir aser linük atema tayongzükba ka," ta metetdaksü.

Evangelical lenirtemisa, tang Kenya nung loktiliba aser rongsenkettzüng tsütsü timtem balala ajangshiba ya koktettsü atema tanela jenjang repringshiba den külemi sensotemi pei teinyaksü shilem inyaksü nüngdak, ta metetdaksü.

Rev. Joseph Kamau-i, county shia nung sarasademtsü atema coordinators shimtsü, region shia nung sarasademtsü, hopta shia sarasadem sentong agitsü aser kibok shia nung linük atema sarasademtsü nukjidong

nung iba movement ya tenzüker, ta metetdaksü.

Iba sentong nung jembdiang Khristan lenir Peter Kinyanjui-i, "Onoki yimtenren movement ka masü saka linük atema tanelar tongbang ka tenzüker. Ano election mongpu ka atongba mapang nung Arogoi sarasadema alitsüla, aser ibaji evangelical Arogotem aser ministry lenirtem tangatetba lir," ta metetdaksü.

International Leadership University nung vice chancellor, Professor Tim Kiruhi-i, linük mejungi kongshiba tebilemstü onüktem atema Khristantemi ola madoki malitsüla, ta ashi.

Paisa, "Asentenshiji Tsüngrem tsüsuba kibong nungi tenzüksüla. Longjema aliba, akasoa aliba, meshiteta aliba aser tanela nem anidaktsüba Arogoi dang taneptsüba aser teimla agütsütetba den külemi temelenshi bener arutsütetstü," ta metetdaksü.

Uganda nung Khristan ana küm ana sülen tepuokdak nungi chiok



May 25, 2026: Uganda nung Islam yimsü toktsür Khristan yimsü agizükba agi Khristan ana tepuokdak küm ana tashi puoka liasü, ajisüaka tenaprongla tawa chiokogo.

Sowed Kashejjea aser Gad Katusabe naprongla ya Kasese kübok Karusandara nungi lir. 2024 küm tetenzüklen tena Anglican Arogo nung adenba sülen tenati yimjak nung Yisu Khrista agizüka liasü.

Ajisüaka tenati Khristan yimsü agizükba ajanga Muslim nungertembo kanga jashia liasü.

Sowed Kashejjea-i, "Onoki Muslim nungertem den police Tenla ki tsütsüleni aruba anguba mapang nung onoki lendong ajurutsü ta meteta liasü. Künati Khristan yimsü agizükba ajanga yamai timtem ajangshitsu ta meimlai liasü. Ajisüaka Muslim nungertemi Islam yimsü ya yimjung yimsü ka lir ta jembir," ta metetdaksü.

Police-i Khristan anaji Tenla kima apu aser tenati mosque nungi pakti aser Quran auya ta tena nem tai tonglokja ken o benoka liasü.

Karusandara nunga aliba Khristantemibo, Khristan ana nem tiyazü nung tai tongloktsü, kechiyong tena anema kuli kecha mali, ajisüaka Islam yimsü toktsüba agi Muslim

nungertemi tena anema inyaker, ta metetdaksü.

Tena anema kuli meliaka ketdangsertemi tenaprong jail nung puok.

Kasese Archdeaconry nung archdeacon, Alfred Mugisa-i, Muslim nung lenirtemi tena dang nena jail nungi chiokdaksünüra nenati Khristan yimsü tokjang ta rongshia liasü, ajisüaka tenati Khristan yimsü medoktsü, ta ashi.

Mugisa-i, "Tena talenba nungi salatsü atema tenati Khristan yimsü toktsütsü memelung. Tena jail nung aliba mapang nunga Arogo nung lenirtemi maneni tena dang sayutsüngia liasü aser parnok kinüngtsür aser chirnurtem den Tsüngrem O lemsatapa liasü. Tena jail nung aliba mapang nung tamang jenjang tashitaitba dang aküm," ta ashi.

Sowed-i, "Küna tepuokdak kanga timtema liogo ajisüaka iba ya küna taküm nung Tsüngremer sentong ka liasü," ta ashi.

Arogo nung lenirtem aser Karusandara nung Archdeacon-i aiben mepishiba nung ajemdaker taoba ita ken o angadanga mapang nung tena anema kuli kecha mali ta bushitet, aser ibaji ajanga tenaprong jail nungi chiok.

AO OSHI ANGAZÜKDAK:

TANÜ ANGAZÜKTSÜBA OJANG



Yiki

(n) yi ayokdak aser ajemdak ki (wine shop, bar)

* Yiki nung intetertem nisung tajung makümer.

Yilong

(n) teti yi jemer aliba nisung (alcoholic)

* Samaroba yilong kümer asü.

OLONG PAITEP # 7515

Grid for OLONG PAITEP # 7515 with numbers 1-16 in various cells.

TIPIEN

- 2. Auonungchiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 7514 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



May 20, 2026 nü nisung 274 külemi Nepal ajanga Mount Everest talak tonga tuteta alima otsü tasen ka yangluogo.

Mt Everest talaki atuba climbing route nung rüjeb tulu kati anenbangba ajanga nisungtem aika külemi anepdang 3:00 ako nung apuso aser ghonda 11 agia tenemkolak tonga atu.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur nung 'narco-terrorism' anema bike rally agi



Imphal, May 25, 2026

(Agencies): Manipur nung Deobarnü lanur aser tetsür noklang aikati bike rally ka nung shilem agiogo. Iba sentong ya Manipur nung "narco-terrorism" lendongtem anema ayongzük.

Iba sentong ya Indigenous People's Front-i "Save Manipur from Narco Terrorism" omen nung ajemdaker ayongzük aser Sekmai nung Koujeng Leima temple campus nungi tenzükter Imphal nung Khuman Lampak nung tembang.

Iba sentong ya Coordinating Committee on Manipur Integrity (COCOMI) convenor Yengkokpam Dhiren-i tenzüksü.

"Manipur nung narco-terrorist teloktemi inyakba maparen nungi lisopurtem jembua lidaktsütsü asoshi iba sentong ya ayongzüka agir" ta Dhiren-i ashi.

Iba rally ya Luwangsangbam, Chingmeirong, Thangmeiband, Khoyathong, Nagamapal, Keishampat, Bishnupur, Moirang, Kakching, Thoubal, Singjamei aser Wangkhei adena stüi.

Kanglatombi, Imphal West district nung Makhan Naga Village Gate anasa public sentong ka agiba sülen iba rally ayonga agiogo.

Kuki nungeri atsünga agiba aser tan ita tetenzüklen civilians pur aoba anema nisungtemi

lungkak aita liasü.

May 13 aser May 15 tsünga Leilon Veiphei aser Sapormeina nungi tatalokba balala nung civilians 20 pur ao. Parnok 14 chiokogo saka tang tashi nisung 6 pua lir ta lennirtemi ashi.

Tanü lungkak aitertemi Kuki National Front (Presidential) den Suspension of Operations (SoO) agreement agientsü aser security operations akangshitsü takhangba agütsüogo.

Parnokisa BJP MLA Nemcha Kipgen-i telungpur ka den sendaktepa lir anungji la sorkar menden nungi agientsüla ta lungkak aitertemisa takhangba agütsüogo.

Assam BJP-i MLA tasen 82 nem tenüngsang agütsütsü

Guwahati, May 25, 2026

(Agencies): 2026 Assam Legislative Assembly elections nung Bharatiya Janata Party (BJP)-i takok tulu anguba sülen Assam Pradesh BJP-i May 26 nü Guwahati nung MLA tasen 82 nem tenüngsang agütsütsü.

Iba sentong ya Srimanta Sankardev International Auditorium nung nikongdang 6:00 ako nungi agitsü. Kasa anogo anepdang 10:00 ako nungi Sri Sri Damodardev Auditorium nung district aser mandal presidents den special

organisational meeting ka amentsü.

Party-isa organisational districts 39 aser mandals 433 presidents ajak nem tetushi agütsütsü. Assam nung BJP-i kümsük asemen atongtepa takok anguba atema tenüngsang agütsütsü ta BJP Assam Pradesh headquarters-i sangdong ka nung ashi.

"2026 Assembly elections nung BJP-i takok anguba ya state ajungalen grassroots workers aser organisational leaders-i anibelem arema aser bendanga

aguja inyakba ajanga lir" ta party spokesperson Pranjal Kalita-i ashi.

BJP züngsem lakh 65 jungnüa aser active karyakartas 72,000 shi kati polling booths 31,486 nung inyakba ajanga BJP-i takok tulu angu ta pai ashi.

Iba sentong nung Assam Chief Minister Himanta Biswa Sarma, State BJP President Dilip Saikia, Union Minister Sarbananda Sonowal aser Union Minister of State Pabitra Margherita nunger den tongti BJP lennirtem adentsü.

Assamese tsür Rupamoni-i Mt Everest talak tonga atu



Guwahati, May 25, 2026

(Agencies): Lakhimpur nungi Rupamoni Goh ajanga Assam aser linük asoshi konang bentsür

aruogo aser ibaji Mount Everest talak tonga tutetba lir.

Assam tsür kati alima nung tenem talangtiba Mount Everest

talak tonga atuba mezüngbubaji Rupamoni Goh lir.

Indo-Tibetan Border Police (ITBP) All-Women Everest Expedition 2026 nung züngsem ka ama Rupamoni-i iba mapa inyaktetogo. Iba Expedition ya tetsürtemi mountaineering aser extreme adventure sports nung shilem tajung agiteter ta sayutsü atema special mission ka liasü.

May 21 nü iba expedition team ajanga Nepal tsütsü nungi South Col route ajanga 8,848-metre summit atong. Iba telok nung women climbers 11 den technical support personnel asem dena liasü.

Anepdang 6:52 ako meta tsüngsang mejungaka aser high-altitude timtem liaka Rupamoni-i talak tonga tutet.

GOVERNMENT OF NAGALAND DIRECTORATE OF EMPLOYMENT, SKILL DEVELOPMENT & ENTREPRENEURSHIP NAGALAND, KOHIMA NOTIFICATION

Dated Kohima, the 22ndMay,2026

NO.DET-7/20/2001 (Vol-VII):-/ It is hereby notifiedthatTrade Test Examunder SCVT will be held in the month ofJune / July 2026.In this regard, Trainees (repeater) who are willing to appear the Exam are hereby informed to fill up the examination form on or before the8thof June2025 (Monday)intheir respective Govt. Industrial Training Institute (Govt.ITI).

Sd/- SAVIO VISA Director.

Iran World Cup base US nungi Mexico-i belenogo

Monupii/May 25, 2026 (Agencies): Iranian FA tir-i ashiba agi, par linük World Cup training base United States nungi Mexico-i belener aotsü atema FIFA-i agizükogo.

Mehdi Taj-i ashiba agi, Iran team Mexico kübok US den arrtsü nung aliba Tijuana yimti nung amendaker training agitsü, ajisüaka iba temelenshi indang FIFA-i metetdakja mali.

Iran nem parnok indang World Cup base asütsü atema Tucson, Arizona lemzüksü, ajisüaka Middle East nung rara adoker aliba aser security dak sendakba nung ken o mejangjai aliba ajanga parnok iba asayamung nung shilem agitsü magitsü terata nung lir.

Iba asayamung ya US, Canada aser Mexico nung ayongzüka asayatsü, aser Iran team Los Angeles nung June 15 nü New Zealand den aser Belgium den June 21 nü asayatsü. Iba sülen parnok Egypt den Seattle nung June 26 nü asayatsü.

"World Cup nung shilem agiba linük aika indang team base camp ya FIFA-i agizüksü

nüngdaker," ta Taj-i ashi.

"Tia ka-a onoki temepeshiba agütsüba den Fifa aser World Cup ketdangsürtem den Istanbul nung senden amenba aser Hokolbarnü Tehran nung Fifa secretary general [Swede Mattias Grafstrom] den webinar senden ka amenba sülen onok indang team base United States nungi Mexico-i belener aotsü mepeshiba agizükogo.

"Onok Tijuana nung amendaker asayatsü, koba Pacific tzüyim anasa aser Mexico aser United States na arrtsü nung lir," ta pai ashi.

Paisa, Arizona nung Iran nem lemzüksüba camp dang nungibo Tijuana nungi Iran asayatsü aliba yimtem anasaba lir, ta shisem.

"Onok LA nung asaya ana asayatsü lir aser iba yimti atongtsü atema minute 55 dang agitsü, koba Tucson dang nungi anasaba lir," ta Taj-i ashi.

Iran team World Cup atema tang southern Turkey kübok Antalya yimti nung training agidar.

Iba ita tetenzüklen Taj-i Iran

nunger asayartem iba asayamung atema visa mangu lir, koba June 11 nü tenzüksü ta ashi.

Iranian FA (FFIRI)-i parnok World Cup nung asayatsü atema takhangba 10 agütsüogo, kong Islamic Revolutionary Guard Corps (IRGC) nung military training agir aliba asayar, coach aser ketdangsür ajak nem visa agütsütsüba densema lir.

US Secretary of State Marco Rubio-i, iba asayamung nung shilem agitsü atema Iran nunger asayartem pelashishia agizüksü, saka IRGC den sendaktepa alirtem linüki aittsü memelatsü, ta ashi.

April ita Vancouver, Canada nung Fifa annual congress nung adentsü atema aoba mapang Canada arrtsü nungi meyipa Iran-i aoba ketdangsürtem rongnung Taj-a densema liasü. Pa ya IRGC den sendaktepa aliba ajanga visa thitsü.

Squad nungi züngsem kar Brehostibarnü Ankara nung US embassy-i iba asayamung atema visa application benoktsü atema ogo.

Bruno Fernandes-i otsü tasen ka yangluogo



Monupii/May 25, 2026 (Agencies): Manchester United nungi asayar Bruno Fernandes-i Deobarnü Brighton den asayaba mapang otsü tasen ka yanglua, pa ya Premier League season ka nung assist timtiba sütsüba asayar kümogo.

2025-26 season nung Man United pur tatembangbuba asaya Amex Stadium nung Brighton and Hove Albion den asayaba mapang minute 33buba nung Bruno-i Patrick Dogru nem ball tajung ka agüja goal idaktsüba sülen pa indang assist 21 aküm.

Bruno masüdag asayar kati danga tanga tashi nung Premier League season ka nung assist 21 süja mali.

Iba asaya nung Bruno-i assist ka sütsüba dang masü saka goal-a ka idakja liasü.

Premier League season ka nung assist timtiba sütsüba record ya Arsenal nungi asayar Thierry Henry-i bener liasü. Pai 2002-03 Premier League season nung par teammate tem atema assist 20 süja liasü.

Henry-i assist 20 sütsür aliba ya Manchester City midfielder Kevin De Bruyne-i 2019-20 season nung menepa liasü.

Bruno masüdag Manchester United atema Premier League season ka nung assist timtiba sütsüba record ji David Beckham-i bener liasü. Beckham-i 1999-2000 Premier League season nung assist 15 sütsü.

Dorgu nem assist sütsüba ya corner ka nung liasü aser iba tetezü pai ano record ka menepogo. Portugal nunger asayar yagi set-piece ajanga assist 11 sütsüogo, koba taoba mapang 2013-14 Premier League season nung Liverpool nungi asayar Steven Gerrard-i ajangzükter liasü.

Pai tang tashi nung Man Utd atema tetoktepba ajak nung assist 104 süja lir. Pa Ryan Giggs (249), Wayne Rooney (127) aser David Beckham (115) nunger sülen pezübuba nung lir.

Sindhu, Sen nati anir India nunger asayartem Singapore Open asayatsü



Monupii/May 25, 2026 (Agencies): Lakshya Sen aser PV Sindhu nati anir India nunger badminton asayartem USD 1,000,000 Singapore Open Super 750 tournament nung asayatsü, koba Mongolbarnü tenzüksü.

Lakshya shibai tesüsa taoba küm November ita Australia Open kokogo, pa taoba hopta mezüngbuba round nung tsükba sülen pa iba asayamung nungbo tajungba asayatsü imla alitsü. Pa mezüngbuba round China nunger asayar Lu Guang Zu den asayatsü.

Lakshya-i taküm All England Championships akoktsü timla liasü, saka final nung asaya mekoki tanabuba jenjang nung dang tembang.

Tetsür kija asaya nung Sindhu shiba Thailand Open nung quarterfinals tonga asayaogo, la mezüngbuba asaya Indonesia tsür fifth seed Putri Kusuma Wardani den asayatsü.

2025 küm yiruba sülen nungi Sindhu-i junga masayateti arudar, aser pa BWF World Tour events balala nung kanga kara tsüka arudar.

Tebur kija asaya nung Ayush Shetty mezüngbuba round taoba küm World Championships bronze medallist Canada nunger Victor Lai den asayatsü.

Maneni Kidambi Srikanth aser HS Prannoy nata iba asayamung nung asayatsü renemdar. Srikanth mezüngbuba asaya Loh Kean Yew aser Prannoy Indonesia nunger fifth seed asayar Jonatan Christie den asayatsü.

World No. 22 Unnati Hooda, shibai taküm Polish Open kokogo, la eighth-seeded Japan tsür Tomoka Miyazaki den asayatsü.

Hooda aser Miyazaki na asemben asayaogo aser asembenprongla Miyazaki-i koka lir.

Tetsür kija asaya nungsa

Malvika Bansod Chinese Taipei tsür Lin Hsiang Ti den asayatsü.

Tebur tarep asaya nung fourth-seeded India nunger tarep Satwiksairaj Rankireddy aser Chirag Shetty na America nunger tarep Zhi Yi aser Presley Smith na den asayatsü.

Hariharan Amsakarunan aser M.R. Arjun nata Japan nunger tarep Takuro Hoki aser Yugo Kobayashi na den asayatsü.

Tetsür tarep asaya nung Kavipriya Selvam aser Simran Singhi na Spain tsür Paula Lopez aser Lucia Rodriguez na den asayatsü.

Panda sisters, Rutaparna aser Swetaparna na Thailand tsür Phattharin Aiamvareesrisakul aser Sarisa Janpeng na den asayatsü.

Maneni Ashwini Bhat K. aser Shikha Gautam nata Chinese Taipei tsür Chang Ching Hui aser Yang Ching Tun na den asayatsü.

Spain World Cup squad nung Real Madrid nungi asayar ka danga mali

Monupii/May 25, 2026 (Agencies): Spain-i FIFA World Cup 2026 atema asayar 26 agi küm tetba squad sangdongogo, aser küm 92 nung tang mezüngbuba squad nung Real Madrid asayar ka danga mali.

Madrid ya alima nung club tajungtiba rongnung ka lir, saka parnok 2025-26 season nung takok marok ka danga mebeni tembangogo. Arishi küm 21 tain defender Dean Huijsen team nung züngoksemtsü imla liasü, saka Luis de la Fuente-i Pau Cubarsi, Aymeric Laporte, aser Eric Garcia nungerang shim.

Taoba Real Madrid captain Dani Carvajal, shibai taküm club toktsütsü, pa taoba season ka ana meyiru asübo team nung züngoksemer lila.

2020 European Championship nunga Spain squad nung Madrid nunger asayar ka danga maliasü, saka Euro 2024 akokba team nungbo Carvajal, defender Nacho, aser striker Joselu nunger densema liasü. Iba asayamung sülen Nacho aser Joselu nati club toktsüogo.

Squad nung La Liga champions Barcelona nungi asayar 8 (Joan García, Cubarsi, García, Pedri, Gavi, Dani Olmo, Ferran Torres, Lamine Yamal)

lir. Ano Premier League champion Arsenal nungia asaya 3 (David Raya, Martín Zubimendi, Mikel Merino), Athletic Club nungi 3 (Unai Simón, Laporte, Nico Williams), aser Atlético Madrid (Marc Pubill, Marcos Llorente, Alex Baena) nungi asayar 3 squad nung densema lir.

Taküm World Cup nung Spain team Group H nung Cape Verde, Saudi Arabia, aser Uruguay den ata lir, aser parnok mezüngbuba asaya Cape Verde den June 14 nü asayatsü. Yamal aser Williams nunger amala asayar tejung team nung lir asünung parnok semi-final tongabo asayatsü imlar.

FIFA World Cup 2026 atema Spain Squad :

Goalkeepers: Unai Simón, David Raya, Joan García

Defenders: Marc Cucurella, Alejandro Grimaldo, Pau Cubarsi, Aymeric Laporte, Marc Pubill, Eric García, Marcos Llorente, Pedro Porro

Midfielders: Pedri, Fabián Ruiz, Martín Zubimendi, Gavi, Rodrigo Hernández, Alex Baena, Mikel Merino, Mikel Oyarzabal

Forwards: Dani Olmo, Nico Williams, Yeremy Pino, Ferran Torres, Borja Iglesias, Víctor Muñoz, Lamine Yamal.

BILEMDANGANG

"Nükjidong dak rangloker tanen makai inyaker temi langkabosa ajangzükter."